

POLIS GIAT CARI MANGGO

22 ahli sindiket pinjaman tidak wujud tumpas

Oleh Hafidzul Hilmi
Mohd Noor
hafidzul@hmetro.com.my

Kuala Lumpur

Sindiket pinjaman tidak wujud yang aktif memperdaya dan menipu mangsa membabitkan kerugian lebih RM150,000 sejak Januari lalu tumpas selepas polis menahan 22 individu dalam dua serbuan berasingan di Jalan Setapak dan Jalan Off Genting Klang di sini, Selasa lalu.

Ketua Polis Kuala Lumpur, Datuk Seri Mazlan Lazim berkata, serbuan dijalankan hasil risikan menerusi Op Seagull oleh Bahagian Operasi dan Bantuan Teknik Jabatan Siasatan Jenayah Komersial (JSJK) Bukit Aman dan JSJK Kuala Lumpur.

Beliau berkata, serbuan pertama dilakukan di sebuah premis di Jalan Setapak pada jam 6.45 petang dan berjaya menahan enam individu berusia 25 hingga 39 tahun.

“Polis merampas 19 telefon pintar, 14 buku nota dan dua pasport negara India dalam serbuan berkenaan.

“Susulan serbuan itu, polis kemudian menyerbu kediaman di kondominium mewah di Jalan Off Genting Klang pada jam 9.15 malam,” katanya pada sidang media di Ibu Pejabat Polis Kontinjen (IPK) Kuala Lumpur di sini, semalam.

Mazlan berkata, serbuan kedua berkenaan berjaya menahan 16 lagi individu dipercayai ahli sindiket penipuan berkenaan yang berusia 18 hingga 39 tahun.



MAZLAN (tengah) menunjukkan pelbagai barangan yang dirampas.

“Serbuan berkenaan berjaya merampas 36 telefon pintar, dua komputer riba, 14 buku nota, empat beg dan dua kad akses.

“Siasatan mendapati modus operandi suspek adalah

menyebar-kan tawaran pinjaman secara rawak sebelum dihubungi pelanggan,” katanya.

Menurutnya, apabila pelanggan menghubungi mereka, sindiket berkenaan

akan meminta dokumen sebelum memberitahu pinjaman yang diminta sudah diluluskan.

“Bagaimanapun, peminjam perlu membayar yuran pemrosesan dan cukai sebelum wang pinjaman dimasukkan ke dalam akaun.

“Mangsa yang terpedaya dengan taktik sindiket berkenaan akan memasukkan wang ke akaun keldai,” katanya.

Mazlan berkata, pihaknya kini mengesan dalang uta-

ma sindiket berkenaan dikenali sebagai Manggo dan dipercayai masih berada di negara ini.

“Polis percaya dapat menyelesaikan 29 kes pinjaman tidak wujud di sekitar Kuala Lumpur dengan kerugian RM150,000.

“Semua suspek yang ditahan kini disambung reman sehingga 16 Mac ini bagi membantu siasatan mengikut Seksyen 420 Kanun Keseksaan,” katanya.



MAZLAN menunjukkan bahan kes pada sidang media, semalam.